

東華續錄

同治朝卷十八
卷九十六之一百

第 五 冊

東華續錄

續錄
卷之二

明倫彙編

同治東華續錄九十六

臣王先謙敬編 臣張式恭恭校

同治十二年癸酉春正月辛巳朔元旦節停止筵宴 上詣 堂子行禮○癸未諭內閣朕於三月初五日恭奉 慈禧

裕皇太后 慈禧端佑皇太后啟鑒初八日祇謁 東陵初九日節屆清明朕恭詣 定陵行數土禮並詣 隆恩殿行大

饗禮虔申孺慕禮成後於十二日還宮所有典禮並一切事宜著各該衙門照例敬謹豫備○諭軍機大臣等奎昌等奏追

剿賊匪出境豫籌防剿一摺官軍於上年十一月間在那瑪勒吉幹招地方遇賊接仗賊即敗竄探聞該匪兩股每股五六

百名一竄科布多迤西一路不知何往一回竄肅州邊外之厄濟納河諾彥山一帶與該處踞匪會合又聞該逆欲將所擄

貨財販運於綏遠城庫倫多買槍藥圖在邊外肆擾肅州踞賊屢竄出關必須迅克肅州城方免蔓延為患著左宗棠檄飭

徐占彪會合金順兵勇奮力進剿剋期攻拔務將該逆醜類就地殲除毋任紛竄關外又成不了之局其厄濟納河諾彥山

地方為肅逆巢穴該大臣兵力此時能否兼顧並著酌度辦理奎昌等擬俟請調之官兵軍械到齊後騰出察哈爾馬隊令

其移營察漢淖爾地方作為追剿之兵隨時探明諾彥山等處賊勢相機攻剿即著奎昌常順多布沁扎木楚志剛悉心商

酌妥籌布置其竄往科城迤西一股究在何處滋擾著托倫布保英確切偵探派軍截剿盡殄賊氛並著定安張廷岳阿爾

塔什達多派官兵於所屬境內認真盤查毋任賊匪潛行販運以杜詭謀奎昌等摺內所稱該匪黨內多有花勇係屬何項

勇丁並著查明具奏所有此次打仗出力官兵及在事各員准其擇尤保奏毋許冒濫將此由六百里各諭令知之○丙戌

以李宗義為兩江總督並充辦理通商事務大臣前山西巡撫○以張樹聲為江蘇巡撫文彬為漕運總督李元華為山東布政

使長廣為山東按察使由兗沂曹濟道遷○戊子享 太廟○辛卯祈穀於 上帝○壬辰撥部庫銀二十萬兩濟景廉軍餉○常

恩以病免調廣壽為刑部右侍郎以成林為理藩院右侍郎由大理寺卿遷○癸巳諭軍機大臣等奎昌等奏借地安插棍噶扎勒

參徒眾請將出力委員獎勵各摺片據稱棍噶扎勒參徒眾回阿爾泰山耕牧奎昌等因該處係烏梁海蒙古牧地非辦理

清楚不能彼此相安令即補佐領雅爾哈前往阿爾泰山會同科布多委員與烏梁海兩翼散秩大臣妥為籌辦該散秩大

臣等情願借地安插該呼圖克圖等亦皆樂從等語自是目前權宜辦法惟安插徒眾究有若干棍噶扎勒參要求究係何

事均未據一一聲敘著即詳細奏聞奎昌見已起程回京即著常順多布沁扎木楚志剛隨時妥為駕馭毋任滋生事端該

烏梁海地屬科布多著托倫布保英畱心察看先事防維毋稍疏忽並飭烏梁海兩翼散秩大臣等諭知該蒙古人眾各守

本分務令永遠相安即補佐領雅爾哈著仍以前保佐領軍功班次遇缺儘先即補補缺後以協領儘先補用以示鼓勵將

此由五百里各諭令知之○乙未諭內閣劉嶽昭曾璧光奏官軍會克新城老集黔省上游肅清一摺貴州新城地方與雲南平彝等州縣接壤逆回金萬照等廣集其間爲患兩省經劉嶽昭等飭令雲貴各軍會合進剿疊將賊洞攻毀擒斬甚多上年十月初五日官兵會同直逼城下攻入南門將逆首金萬照等擒獲正法首要各逆悉數殲除當將新城克復黔省上游一律肅清見在全省底定自應渥予恩施曾璧光著賞給頭品頂帶太子少保銜雲騎尉世職周達武著賞給騎都尉世職以獎勞勩○諭軍機大臣等黔省新城逆回日久負隅此次該將領奮勇攻克將要逆悉數剪除上游一律肅清剿辦甚爲出力黔省變亂十有餘年見在地方新復一切善後事宜亟應妥爲經理著曾璧光等懷遵疊次諭旨悉心籌辦以期一勞永逸新城降眾二千餘人業經該撫等籌商安插仍著飭令地方官撫綏防範毋貽後患降日張忠誠著劉嶽昭隨時察看如再不知悔改卽行明正典刑不得稍事姑容該處逃亡人眾漸次復業曾璧光務慎選賢能守令盡心撫輯用副朝廷軫恤殘黎至意該兩省官軍應如何分別留防撤回以資鎮壓並節餉需之處著劉嶽昭曾璧光周達武妥籌辦理將此由五百里諭知劉嶽昭曾璧光並傳諭周達武知之○子貴州陣亡總兵官劉同升等祭葬世職○丙申允王文韶奏分別遣留湖南援黔各軍○戊戌諭軍機大臣等總理各國事務衙門奏請派員辦理日本國換約事宜一摺日本國通商條約上年經李鴻章與該國使臣會同議定茲該國使臣來津換約著派李鴻章將上年所立條約妥爲互換其條規二本卽由總理各國事務衙門發交李鴻章祇領照辦其親奉國書一節著李鴻章於換約時體察情形妥慎酌辦將此諭令知之○己亥子甘肅被賊總兵官魏紀鑒祭葬世職○辛丑諭軍機大臣等前據左宗棠奏成祿糜餉遷延舉動乖張當經諭令穆圖善密查具奏旋據穆圖善覆稱成祿不知檢束參款俱屬有因本應治以應得之罪因念成祿業經出關所部之人接統是以未經降旨本日復據左宗棠奏成祿前在高臺苛派捐輸迨土民赴營申訴復指爲聚眾抗糧誣爲叛逆並將寄寓之權家園莊園定掩捕殺斃二百餘人猶且虛報勝仗籲請獎敘等語是該提督喪心昧良情罪重大實難一日姑容金順前奏行抵涼州卽日督飭後隊赴肅此時計已馳抵肅州著卽酌帶所部兼程出關接統成祿各隊一面傳旨將成祿革職拏問卽日遴派員弁押解來京聽候治罪毋得稍涉遲延致有洩漏肅州軍務已諭令左宗棠責成徐占彪等迅速攻剿應否酌增勁旅卽由該督調派金順於拏問成祿派員押解起程後卽在安敦玉一帶扼要駐紮聽候諭旨該將軍所部各隊及分紮後路之軍應如何調赴前敵酌顧運道之處卽著金順斟酌軍情妥爲籌畫奏明辦理將此由六百里密諭知之○諭本日據左宗棠奏成祿在高臺時苛斂捐輸誣民爲逆縱兵冤斃多命所犯情節重大斷難一日姑容已密諭金順傳旨將成

祿革職鞫解京治罪矣。聞外距京寫遠，解送務須嚴密，除由金順派員押解外，著左宗棠多派得力員弁沿途護解，並飭經過地方官接續遞解前進，不得稍涉疏虞。前署高臺縣知縣管笙著左宗棠一併派員押解來京，質證毋任成祿得以狡展。至金順所部兵勇或調赴前敵，或分紮後路軍糧關緊要左宗棠務當隨時妥籌接濟，毋令缺乏。一切運送軍糧軍火並徵飭地方官毋得稍分畛域，肅州軍務即責成徐占彪等認真勦辦，迅速弭逆，氛如須添撥兵勇，即著酌量調派以資得力。所請將通判王佳植等免議生員李載寬等昭雪之處，俟定案時一併降旨。將此由六百里密諭知之。○王寅免直隸各屬同治六年以前民欠旗租。○癸卯諭內閣朕奉 慈安端裕皇太后 慈禧端佑皇太后懿旨：三載考績爲國家激揚大典，中外滿漢諸臣有能恪共職守，勞勩最著者，允宜特加甄敘，以示優眷。茲當京察屆期，吏部開單題請，詳加披閱。恭親王首贊樞廷，歷久不懈，盡心輔政，鉅細靡遺，懋著勩勞，深資倚任。著交宗人府從優議敘。大學士文祥吏部尚書寶鋆兵部尚書沈桂芬工部尚書李鴻藻和衷贊畫，矢慎矢勤，均著交部議敘。大學士直隸總督李鴻章盡心民事，宣力彌勤，陝甘總督左宗棠公忠謀國，艱鉅克膺，均著交部從優議敘。著照舊供職。○添撥永定河修防戰兵十名守兵九十名。○張樹聲請將移撥南匯營之狼山鎮中營守備一缺仍畱狼山管理錢糧事宜，下部議允之。○甲辰諭內閣劉嶽昭奏毓英奏克復大理府城首逆伏誅全郡肅清一摺：逆首杜汶秀盤踞大理府城十有八載，地險城堅，負隅抗拒。上年五月間官軍攻克上下兩關，賊勢漸蹙。雲南巡撫岑毓英先將近省及東南各郡次第廓清，督兵前赴迤西規取大理。十一月初十日至二十等日，總兵楊玉科及派出各將弁開挖地道轟陷大理東南城隅，乘勢擁入城內之土城晝夜鏖戰，共斃賊二千餘名，奪踞蓮花池一帶賊壘。官軍攻偏土城西北隅，楊玉科復約束各軍四面合擊，自率親軍策應，施放開花大礮轟毀賊營，燬樓木柵逆首杜汶秀見事勢危迫，於二十五日親率死黨萬餘接仗。楊玉科督軍兜剿，至二十六日斃賊五六千名，該逆敗入土城內，之爲城情急服毒，其黨將杜逆獻解軍前。正法岑毓英督軍至五里橋地方環城審視，探知餘酋楊榮榮蔡廷棟等仍形負固，會商楊玉科先期密派將弁暗入分投設伏。十二月初七日楊玉科率同太和縣知縣譚席珍直至縣署駐紮。初九日潛入偽府督令伏兵奪據該逆廠樓賊眾驚亂，岑毓英復親率各軍與楊玉科內外夾擊，連日血戰殺賊萬餘，賊分股由東南北三門狂竄。我軍跟蹤追擊，生擒偽大冢宰馬仲山等多名，殲賊三千餘名，生擒偽大司衡楊榮偽大經略蔡廷棟等，盡法懲治。並按獲杜逆子女杜淙揚等分別收禁，悍黨悉數殲除。大理全郡肅清，覽奏實深欣慰。逆酋杜汶秀首級卽著於犯事地方懸竿示眾，毋庸獻馘來京。其年未及歲之逆子杜淙揚杜震揚杜城揚三名及幼女一人著在該省嚴行監禁，並著刑部查

明例案咨行該督撫照例辦理雲南巡撫岑毓英當兵餉支絀之時激勵眾心親臨前敵攻克堅城渠魁授首實屬謀勇兼裕調度有方深堪嘉尚著賞穿黃馬褂並賞給騎都尉世職雲貴總督劉嶽昭與岑毓英和衷共濟克奏膚功著開復革職畱任處分交部從優議敘記名提督開化鎮總兵楊玉科著賞給騎都尉世職並賞給白玉翎管一支白玉搬指一箇小刀一柄大荷包一對小荷包兩箇所有單開之總兵段瑞梅等均著交軍機處記名遇有提督缺出請旨簡放○諭軍機大臣等杜逆自倡亂以來流毒十有八載攻陷五十三城踞險負隅其勢甚熾岑毓英於兵單餉絀之時激勵眾心堅忍耐苦先將東南各郡次第蕩平然後事事西卒使全境肅清渠魁授首實屬謀勇兼裕功績懋昭劉嶽昭遇事和衷克濟成績均堪嘉尚本日已明降諭旨分別加恩並將出力陣亡各員照所請獎卹俟該省全境肅清再行普沛恩施大理既復未復之順甯雲州及所屬之小猛統猛郎錫臘又騰越廳城及所屬之烏土寨馬家村並蒙化廳屬之大小圓埂自應乘勝掃蕩俾全省一律廓清卽著岑毓英督同楊玉科將圍埂賊巢迅速攻拔一面料理大理善後事宜務臻妥善順甯雲州兩城前有旨令馬如龍前往攻取該提督以餉絀尚未起程所派頭起官兵僅五百名亦嫌單薄岑毓英見擬就近分軍相機進取仍著傳知馬如龍據遵前旨剋日帶兵徑赴順甯雲州一帶合兵會剿以竟全功應需餉項卽著劉嶽昭妥籌接濟毋令缺乏至騰越地方卽責成總兵李維述帶領所部前往辦理毋稍遲誤將此由六百里各諭令知之○諭文麟奏追剿東山竄匪獲勝一摺肅州股匪屢次出關竄擾哈密東山經又麟派令統領魏忠義督軍駐紮塔爾沁堡城分扼各隘探剿馬賊並將逆回馬五十九擒獲惟該逆分股突竄蹤迹靡常刻雖被擊遠遁難保不去而復來仍著飭令魏忠義將各要隘實力嚴防遇有賊匪竄至卽行截擊毋令分竄其二堡葫蘆溝一帶爲該逆出竄之路並著嚴飭張忻李生元等多設偵探嚴密扼堵以免疏虞將此由五百里諭令知之○乙巳欽奉 慈安端裕皇太后 慈禧端佑皇太后懿旨皇帝寅紹丕基於今十有二年載春秋鼎盛典學有成茲於本月二十六日躬親大政欣慰之餘倍深兢惕因念我朝 列聖相承無不以敬 天法祖之心爲勤政愛民之治況數年來東南各省雖經底定民生尚未又安滇隴邊境及西北路軍務未蒞國用不足時事方艱皇帝日理萬幾當敬念惟 天惟 祖 宗所以付託一人者至重且鉅祇承家法夕惕朝乾於一切用人行政華華講求不可稍涉怠忽視朝之暇仍當討論經史深求古今治亂之原克儉克勤勵精圖治此則垂簾聽政之初心所夙夜跂望而不能或釋者也廷王大臣等均宜公忠共矢勿違恐嫌本日召見時業經諄諄面諭其餘中外大小臣工亦當恪恭盡職痛戒因循宏濟艱難弼成上理有厚望焉○奉 懿旨前因皇帝沖齡亟宜乘時典學特簡師傅朝夕輔導於今十有

二年茲值親政伊始仍當不忘古訓況學問事功互相表裏古今治忽之原政事得失之故無不可因事監觀引爲法戒
列聖文謨武烈載在 聖訓尤應按日恭閱庶於用人行政得有遵循國語清文亦必勤加練習皇帝每日召見後仍應

詣弘德殿與諸臣虛衷討論李鴻藻徐桐林天齡桂清廣壽均著照常入直盡心講貫用收啟沃之功至肄武習勞乃我
朝家法騎射等事皇帝亦須次第兼習已諭令御前大臣查照舊章隨時斟酌請旨敬謹伺候前據醇親王奕譞奏親政
有期懇將弘德殿差使撤去等語著照所請嗣後毋庸入直弘德殿○丙午 上親政率王以下大學士六部九卿詣

慈甯門行慶賀禮○諭內閣朕受

皇考文宗顯皇帝付託之重冲齡踐阼時事多艱仰賴 慈安端裕皇太后 慈禧

端佑皇太后垂簾聽政簡任親賢勵精圖治十餘年來粵捻各匪次第蕩平滇隴邊疆漸臻底定洵足以揚 先烈而奠不
基 盛德豐功超過前古朕仰蒙 慈蔭得以及時典學日就月將茲復渥被 聖慈命朕躬親大政孳孳以敬 天法

祖勤政愛民爲念仔肩至重深懼弗克負荷惟有恪遵 訓諭兢兢業業上懷 祖 宗締造之艱下慰中外臣民之望用

以祇承家法仰答 慈恩至在廷王大臣及各省封疆大吏務當共矢公忠匡朕不逮其餘大小臣工亦宜精白乃心恪恭

盡職勤求吏治又安民生以冀上副我兩宮 皇太后諄諄訓誡至意○諭上年自冬至後朕恭遇 壇 廟大祀敬謹親

詣行禮而 奉先殿未經特祭恭查咸豐二年 皇考文宗顯皇帝親詣 奉先殿致祭行禮朕親政後自當敬法 前謨

用申誠懼謹於三月初一日恭詣 奉先殿前殿讀祝致祭所有應行典禮著各該衙門照例敬謹豫備○已酉諭軍機大

臣等戶部奉部庫空虛應行存儲款項請照初議另款封存一摺四成洋稅銀兩前經總理各國事務衙門奏明解交部庫

另款存儲近因各衙門奏支之款絡繹不絕正項不敷隨時那借殊與初議不符著該部遵照奏准原案全數封存以後各海

關報解四成洋稅隨到隨封連前所存一概不准擅動如庫存正項一時不敷周轉惟八旗兵餉及神機營經費暨隨時緊

要軍需准由該部奏明暫借四成洋稅開放仍俟正項充裕照數撥還其餘一切放款概不准奏借此項致啟那移之漸另

摺奏內府外庫定制攸分各宜量入爲出不可牽混又片奏內府經費仍照舊添撥各等語內務府供應內廷一切用項本

有粵海關天津長蘆應解各款及莊園頭租銀加以戶部每年添撥經費量入爲出何至用款不敷著總管內務府大臣於

一切應用之需覈實撙節並嚴飭各該司員認真辦理毋得任意開銷致涉浮冒其各省關例解款項如逾限不到或仍前

拖欠卽由該大臣等奏明將該督撫監督運使等嚴予處分以儆玩泄至由部奏撥之六十萬兩見經戶部奏明仍按年籌

撥是內府用款不至過絀嗣後不得再向戶部借撥以符定制將此各諭令知之○是月蠲緩直隸安州等五州縣被水上

年額賦江西蓮花等二十八廳縣暨九江府同知所屬歙收新舊額賦雜課廣西永安等二十八州縣被擾被旱上年額賦暨兵米緩徵直隸祁州等三十八州縣被水額賦山東濟甯等三十九州縣東昌等四衛被水被旱被蟲被風上忙額賦租課廣東海陽等四縣被水同治十年額賦兩浙錢清等六場被災電課展緩直隸深州等三十五州縣積欠糧租倉穀

二月庚戌朔諭軍機大臣等前因喬松年奏籌辦黃運兩河情形文彬丁寶楨奏請仍挽復淮徐故道並御史游百川奏河運

並治宜詳籌妥辦等情當經降旨交軍機大臣會同六部九卿妥議具奏茲據遵議會奏請派大員前往山東查勘各等語黃

河自銅瓦廂決口改道北行後泛濫山東境內入爲漕運民生之害見在淮徐故道既難規復豈可聽其自然不爲修治喬松

年前奏堵合霍橋決口築隄束水使由張秋八里廟一口下注入海旁流分注藉以清運所擬辦法究竟是否可行有無窒礙

必須籌畫萬全方可興辦此事關係重大固不可日久因循亦未便輕率從事李鴻章曾在山東勦辦捻匪於黃運兩河情形

閱歷既久自必熟悉著該督將喬松年等所奏悉心體察從長計議應如何妥籌辦法期於漕運民生兩有裨益及辦理有無

把握之處據實詳細具奏原摺片著鈔給閱看將此諭令知之○下詔修省求直言並諭各省舉賢能杜侵濫○癸丑諭軍機

大臣等榮全奏餉細兵單豫籌辦法一摺榮全接到俄官來咨不令管伊犂人民並擬派伊犂官員銀兩不遵卽治其罪且聞

有東進之說榮全以調兵必先集團餉項支絀各省報解寥寥自係實在情形所請將山西等省月協餉銀三萬五千兩由戶

部先撥見款批交神機營與前請每月一萬三千兩之項源源解濟再令各該省將應協之餉解還部庫等語著戶部嚴議具

奏該署將軍務當臨機應變將調兵集團及進兵道路並運解軍火各事宜先行妥爲布置以圖進取俟戶部議定後如何籌

濟餉需卽行諭知該署將軍遵照辦理另摺奏因病懇請開缺又片奏病如增劇擬先赴京就醫各等語榮全宜力邊疆歷有

年所且數年來備嘗艱苦茲因積勞病發懇請開缺廩念殊深惟見在新疆各城未復非熟悉該處情形者斷難勝任榮全當

力疾從公以副委任未可遽萌退志著加恩賞假一箇月在營調理毋庸開缺刻下事關緊要接替乏人不得率行起程回京

致誤事機將此由五百里諭令知之○戊午祭 大社 大稷○加上 慈安端裕皇太后徽號曰 慈安端裕康慶皇太后

慈禧端佑皇太后徽號曰 慈禧端佑康頤皇太后 御慈甯宮 上率諸王大臣行慶賀禮○左宗棠奏西甯附郡地方

震懾兵威其求撫者又經劉錦棠推誠相待羣爲感動陝回中如崔偉畢大才禹中海土回中如冶福慶馬福壽卽江湖三楊

保元目者外各回目悉矢志輸誠天心漸定惟大通縣地居邊徼未覩軍威向陽堡逆目馬進祿下亂泉逆目韓起壽卽半角

頭本叛員馬桂源馬本源腹心大通營都司馬壽尤爲狡黠劉錦棠先飭總兵胡萬亨赴大通督收回眾所繳賑糧木形踴躍

馬桂源由巴燕戎格遣人暗勾馬壽等糾黨戕害領賑難民數十人撫回崔偉舉大才禹中海等願剿賊自效劉錦棠派總兵譚慎典率數十騎督同前進十二月二十六日遇賊於距通十里之姑姑加莊敗之斃賊數十名撫回各隊均有傷亡劉錦棠布置郡防軍隊繼進正月初一日悍賊千餘撲崔偉等營盤崔偉等率馬隊擊走之追殺十餘里斃賊八九十名生擒四十餘名訊出叛弁馬壽之姪馬良才斬之初四日劉錦棠進兵攻向陽堡提督吳隆海陳汝俊蔣月華等由左路進提督熊隆名陳啟明繼之提督余虎恩遊擊董福祥由右路進親率提督席大成進中路譚慎典率崔偉各隊排列河西前甯甯鎮總兵黃武賢亦飭遊擊黃金福率師來會分道猛進出巢之賊約三千餘分東西南三面正修砌礮臺見官軍至拼死抗拒官軍槍礮齊轟繼以刀矛立斃悍賊數十名賊始敗縮堡中憑堡放槍擲石官軍於礮石中冒險肉薄而登傷亡不少吳隆海陳汝俊蔣月華憤甚揮軍毀其堡門奮躍而入各軍亦攀堞齊登立將巷戰之賊千餘悉駢斬之賊之奪東牆出走者約尚三四百人熊隆名陳啟明率馬隊及郭蟒寺練總陳海馬隊追殺淨盡堡中賊均遁入二小堡登樓上屋擲石放槍仍圖抗拒吳隆海董福祥立破其一尙餘一堡正派隊圍攻開礮樓屋頂之賊號呼乞命稱爲賊目所脅請官軍緩攻願盡縛賊目以獻問其姓名始知馬壽馬進祿韓起壽及河西著名匪徒悉在其中當令縛獻首從四十餘人提馬進祿韓起壽陣前殛死餘逆概予駢誅惟雷叛弁馬壽拘守未誅飭令飛告縣城各回勒限出城並捆獻爲逆者始免剿洗其撫回馬福壽又於賊眾中指認與馬桂源兄弟暗相勾結之逆回三十餘人悉訊明斬決餘眾千餘概行釋免軍威丕震各處回眾聞風畏懼搶輿哀鳴願繳馬械獻匪人求免剿洗劉錦棠遂加撫諭令其速繳馬匹槍械勿萌異心自干誅戮惟大通營及永安一帶回巢距大通縣城二十餘里尙須移軍剿辦見正料理拔營臣維西甯地勢遼闊向爲回番窟穴山嶺複沓西北徑通關外西南均接青海西藏四十餘年等於絕域聲教久已不行劉錦棠破賊解圍後回眾震於兵威均各款附惟土客各回多疑善詐自知所犯不赦恐併遭誅戮其黠者復多方煽惑暗肆阻撓此時若操之太蹙必致人人自危兵威一加轉得有所藉口自不得不宣示恩信堅良回就撫之心迨安撫漸多來投者亦請速誅反側自明心迹而後因而用之庶收以回改回之效又此次大通逆目馬進祿韓起壽等鼓惑叛弁馬壽詭謀煽變戕害領賑難民孽繇自作官軍急起剿之逆目無一漏網恩信無渝聲威更暢俾誠心就撫者知感挾詐來投者知畏其於勦撫兼施機宜似尙允協惟馬本源兄弟竄踞巴燕戎格爲時已久雖徧詣各軍求撫而仍巧持兩端暗行勾結必須速予殲除臣宗棠已飭陳湜沈玉遂率河州太子寺三甲集各營隊伍由河州前進令撫回軍功馬占鼐馬永瑞等各率所部爲之前驅並檄提督劉明燈總兵敖天印分扼米拉溝

各要隘以杜竄越復調降參將楊世俊率馬步各營由扁都口一帶移駐大通冀可速赴戎機又奏肅州逆回自十月閒屢敗後伏匿不出惟分股於城西禮拜寺附近添築堡壘爲犄角提督徐占彪分派各營輪班攻撲十二月十九日城賊出馬步三千餘分撲署總兵王子龍黃祖福營勢甚兇悍徐占彪飛調提督陳春萬千總藍明泰循長濠擊其前自率總兵宋賢聲齊懷松遊擊徐春先秦玉盛等從黃草坡鈔其後復飭總兵李洪超陳登雲越長濠擣其中堅三路並進王子龍見援兵已集亦開壁出迎賊腹背受敵退踞城西北隅官軍三面環攻如牆而進賊結隊拚圖抵死不還官軍勇氣百倍縱橫盪決自卯至申鏖戰歷六時之久殲賊甚多復以劈山礮向賊團聚處轟之賊更不支向北奪路而退徐占彪揮軍追殺適副將桂錫楨守備武朝聘各馬隊由北巖頭馳至兩路夾擊賊屍枕藉餘賊竄入北稍門時已二鼓矣計生擒二十八名陣斃悍賊二百餘名訊據擒賊供稱馬四以援絕勢蹙挑悍黨千餘啖以重資爲背城之戰不虞仍爲官軍痛剿賊目死傷甚多當將擒賊斬決徐占彪以城西之堡守禦綦嚴偏攻徒傷精銳惟有用地雷轟之各營弁勇輪挖地道二十三日工竣安置藥匣引綫二十四日初更飭提督黃虎臣徐春先陳春萬率隊順黃草渠繞至堡前阻其出路兼截南稍門出援之賊飭李洪超陳登雲黃祖福率隊前赴堡北遏賊北竄截北稍門及禮拜寺援賊親率馬步環伏堡之左右四更時地雷併發立塌堡牆一丈有餘守牆者多飛墮牆外計斃數十名餘賊開壁四竄伏軍四起呼聲動地賊自相踐踏官軍趁勢越入賊堡刀矛並進陣斬僞千長馬文檢賊六十三名內有僞催兵百長馬四把子堡內賊無一脫者時城內出援之賊亦被李洪超等擊敗之是役共擒斬三四百名訊據馬四把子供稱賊勢窘蹙異常請入城諭撫徐占彪以同情狡詐未准請又知援軍將至攻堅大礮亦與偕來軍心益奮維肅逆勢孤力竭前派提督陶生林戴宏勝等馬步五營歸徐占彪節制調遣已於十二月二十三日行過甘肅州不數日即可抵肅金順先撥各營亦可剋期會剿以局勢論賊愈蹙而兵愈增計可剋期蕪事上諭軍機大臣等大通逆目馬進祿等鼓惑叛弁馬壽詭謀煽變經劉錦棠督軍進剿攻破向陽堡逆巢並將著名逆酋悉數擒斬勦辦尙屬得手叛員馬本源等久踞巴燕戎格偏詣各軍求撫仍持兩端暗行勾結必須迅速勦辦左宗棠已派陳湜等軍由河州前進著卽飭令實力攻剿並嚴扼米拉清等處竄路以期一鼓殲除大通一帶回匪仍著飭令劉錦棠等乘勝進兵勦撫兼施速籌戡定平番碾伯一帶防剿事宜著豫師督飭所部與左宗棠派出各營聯絡策應毋稍鬆懈肅州城西賊堡經官軍用地雷轟破城內賊勢已蹙惟同情狡詐未可輕聽乞撫之詞致墮詭計見在陶生林等軍計已抵肅兵力較厚著左宗棠飭令徐占彪激勵將士奮力圍剿迅拔堅城毋任日久盤踞將此由五百里各諭令知之○左宗棠奏河州回目馬占鰲馬永瑞自就撫後疊辦各務

均極妥慎嗣投捕河州土匪及各處竄匿回目多名臣察其悔罪輸誠切實可冀令挑選回勇兩營飭馬占鼐督帶馬永瑞副之仍歸河州鎮總兵沈玉遂統帶剿賊立功茲據沈玉遂稟稱同治十一年十二月二十八日米拉溝撫回馬夏義飛報馬桂源等率賊千餘衝撲細巷地方圍下眾寡不敵被賊焚掠勢圖東竄當經東鄉回目馬悟眞即馬尕大將河冰凝結各處併力鑿開斷賊偷渡沈玉遂飭馬占鼐馬永瑞率左右兩營隨官軍剿賊復派馬營回目馬仲有下川口回目安朝玉等各率丁壯助剿二十九日抵米拉溝馬夏義等正與賊戰馬占鼐適至率回勇奮力夾擊陣斬悍賊數十名官軍率馬仲有等乘勢壓剿復斃賊數十名生擒二十三名內有馬麻希馬腮巷蘇美成七十八馬洒兒蘇狗免勒者布七名俱著名逆目也餘賊敗竄歸巢官軍回勇均有傷亡又東鄉匪首高復箇亦經馬占鼐等剿平是馬占鼐等投誠以來實能剿賊自效此次馬桂源喉黨出竄合力堵剿痛挫兇鋒尙屬奮勉旋據馬占鼐馬永瑞馬悟眞等赴臣署謁見論以順逆之理禍福之機均能感悟亟思立功自贖合無仰懇 天恩准給馬占鼐花翎五品頂戴馬永瑞藍翎五品頂戴馬悟眞五品頂戴以資觀感出自 鴻施奏入 上允之○左宗棠奏宋慶一軍因鮑源深奏留稽遲良久嗣蒙諭旨飭催西進將士歡忻鼓舞分起趨行宋慶輕騎馳赴蘭州已於二月二十六日接晤面商一切其大隊馬步三月初旬均可於蘭州取齊臣之奏調該軍原

因穆圖善面商率所部赴甘涼以重西路形勢嗣以回任赴陝並請臣事前毫無所聞迨奉旨允其赴陝臣一時倉卒不得不改調宋軍既蒙 聖明鑒允不料爲鮑源深所阻復多稽滯見甫到蘭州不及先扼甘州兼遏西甯逸賊於兵謀未免稍舛然西事方殷正賴機健良將共圖戡定此時惟有暫駐涼州以就軍食俟夏收登塲轉涼郡之糧以赴甘俟甘郡秋收登塲轉甘郡之糧以赴肅庶幾師行無滯制勝可期以愚見度之將來非於肅州設力總臺收儲糧料子藥又於前後各處節設轉運局不可蓋西北用兵艱阻勞費百倍內地勢有固然歷代兵事得失之分必在乎此謹附臣陳明報聞○予甘肅陣亡提督朱南英等祭葬世職○已未以恭上 慈安端裕康慶皇太后 慈禧端佑康頤皇太后徽號禮成 上御太和殿王以下文武官員行慶賀禮頒詔天下覃恩有差○庚申諭軍機大臣等常順等奏督隊進紮以扼賊衝並豫籌軍儲景廉奏請採買戰馬耕牛各摺片烏城防剿緊要見在肅州軍務正在得手誠恐賊匪竄出紛擾該城防堵未可稍疏常順等擬飛催福州禮馬隊並宣化等練軍到城分起扼紮惟福州禮一軍前經諭令杜嘎爾飭令馳赴榮全軍營該城不得截留宣化等練軍亦據李鴻章奏稱該處存兵無多未能抽調諭令該署將軍等咨商張廷岳等於庫防練軍內酌量抽撥就近赴烏常順多布沁扎木楚志剛務當就見有兵力扼紮嚴防勒加偵探備賊勢緊急常順等當親往督剿毋稍疏虞該城需用

火器甚急著神機營調撥洋槍五百桿隨帶洋火藥鉛箭銅帽配帶什物以及擦槍器具排槍二百桿隨帶鉛丸二萬出配帶什物彈模等項卽行解赴察哈爾都統衙門並著定安調撥子母廠四十位隨帶馬架擡槍一百桿隨帶鉛丸一萬出配帶什物彈模等項統由常順等卽派官兵分往迎提以資防剿景廉剿辦賊匪馬匹缺乏並奇古屯田牛隻短少採買維艱著常順多布沁扎木楚志剛托倫布保英各飭所屬會同景廉委員在蒙古部落採買戰馬一千匹耕牛一千頭解送到營俾資應用所需價值先由該城墊發俟景廉軍餉到烏扣還常順等另摺奏遵查烏科兩城具報賊數互異情形據實覆陳等語軍營偵探最關緊要常順等前奏賊匪數目係據該部落探報倉卒馳陳未克確查嗣後惟當確切偵探妥籌防剿毋得稍涉張皇致滋貽誤將此由五百里各諭令知之○同逆犯古城諭景廉防剿○辛酉諭軍機大臣等金順奏前隊進紮肅州設法催運軍糧一摺金順所派前隊總兵俞厚安等軍見已馳抵肅州該前將軍擬將甘州高臺各處糧運辦理稍有端倪卽由高臺滾營前進規取肅州日內計早抵肅惟前因成祿情罪重大諭令該前將軍酌帶所部兼程出關接統其軍傳旨將該提督革職鞫解京又因景廉需兵孔急復諭令該前將軍於接統成祿所部後卽飭李天和三營馳赴景廉軍營聽候調遣關外事機緊要金順當懷遵正月二十一日本月十一日兩次密諭酌帶勁兵剋日出關將諭辦各事妥速籌辦以慰廬懷肅州賊鋒屢挫機有可乘該前將軍所部各隊應否酌留若干助剿抑須全行調赴前敵之處著金順斟酌軍情妥籌辦理該軍所需糧石卽照所議隨時與左宗棠和衷商辦俾利師行○乙丑諭軍機大臣等都興阿奏股匪突出滋擾派隊剿辦情形一摺奉天牛莊屬界黃沙屯高麗房身翼家地雙岔子等處突有馬賊分竄滋擾旋即合股百人麀聚虎獐屯地方經該將軍派令總兵張得祿營總欽馳赴牛莊會同防守尉果勒明阿帶隊接剿追至鷹城子缸瓦嶺等處檢斬甚多餘賊渡河逃逸淹斃無算此股馬賊嘯聚省南山溪之間久逃顯戮見在出擾牛莊屬境雖經斬馘多名誠恐餘黨未盡殲除復圖狡逞都興阿惟當嚴飭派出各員弁等實力按緝務將南路伏莽一律芟除毋畱餘孽至西路地方並飭撤回隊伍認真防範毋得稍有疏虞將此諭令知之○丁卯諭李鴻章嚴嚴捕滋事游勇○改山東文登協中軍都司爲陸路文登營都司隸登州鎮總兵官統轄○庚午諭軍機大臣等劉嶽昭岑毓英奏攻克蒙化廳屬大小圍埂岑毓英奏查明參將梁士美被仇刺殺辦理情形擬派楊玉科進攻順甯等城各摺片蒙化廳屬賊黨見已悉數殲除事機順手自應乘此聲威迅將未復各城力圖攻拔岑毓英前派總兵段瑞梅蔡標等分攻順甯雲州二城兵力尙單著卽責成提督楊玉科親帶所部馳往督同段瑞梅等併力進攻肅清邊圍大理府城一切善後事宜著該撫懷遵前旨酌度辦理其騰越廳城卽飭令李

維述速籌規取毋稍延緩于總沈朝輔向助參將梁士美跋扈驕恣旋因爭權懷怨王使將梁士美刺殺並誘殺紳士多人聚眾謀爲不軌抗拒官軍實屬罪不容誅業經格殺洵足以申國法而快人心其下手兇犯沈有能等仍著該督撫飭屬嚴拏毋任漏網已革副將和耀會剿賊出力前已有旨以總兵記名簡放著照所請准其開復副將原官免繳捐復銀兩並仍照原保獎勵都司楊九貴棄營私逃回籍把持錢糧公事實屬大干法紀楊九貴著卽革職嚴拏究辦以肅軍紀將此由五百里各諭令知之○予雲南陣亡副將岑寬德等祭葬世職○乙亥諭軍機大臣等金順奏全師抵肅剿賊獲勝一摺總兵劉宏發等於正月十四五等日會同徐占彪各隊攻剿肅逆疊獲勝仗剿辦尙屬出力該前將軍督率後隊於正月十八日齊抵肅州卽著懷遠疊次密諭酌帶兵勇星速出關接統成祿所部一面傳旨將該提督革職拏問不准稍涉遲延致有洩漏肅州一城尙稽攻克該前將軍所部隊伍應否酌量若干助剿抑須全行調赴關外之處並著仍遵前旨斟酌軍情妥籌辦理另片奏革員赴營投效等語已革協領花里雅春著准其留營差遣○乙亥予故兩江總督曾國藩於揚州建祠○是月豁免江蘇邳州等十六州縣暨淮安等二衛被擾節年民欠額賦

三月己卯朔諭軍機大臣等張廷岳阿爾塔什達奏賊匪意圖竄擾豫籌堵擊一摺賊匪勾結甘肅州逆黨由阿拉善王旗竄至諾彥山一帶圖犯庫倫暨額爾德尼班第達呼圖克圖及額爾德尼招等處逼近庫倫西南張廷岳等已檄齊莫特多爾濟等各帶所部分投防守並飭宣古兩營會同蒙古各營扼紮庫倫迤西聯絡聲勢以防賊匪奔竄所請尙妥仍著張廷岳等隨時偵探盤查毋任賊匪潛入如遇匪蹤竄近卽著督飭各營相機前後夾擊痛加剿洗以期一鼓聚殲諾彥山等處地多險阻易於藏奸其平原處所路路可通並無要隘足扼賊蹤飄忽靡定各遊牧又路徑紛歧尤虞伺隙四竄亟應一體防範以遏妖氛著定安常順多布沁扎木楚志剛杜嘎爾張曜實力嚴防遇賊卽擊毋任紛竄將此由五百里諭知定安常順多布沁扎木楚志剛杜嘎爾張廷岳阿爾塔什達並傳諭張曜知之○壬午張建基以病免以林之望爲湖北布政使

前甘肅

布政使○癸未

上奉

慈安端裕康慶皇太后

慈禧端佑康頤皇太后啟鑒謁

東陵○免踴路經過地方本年額賦

十分之三○乙酉賞看守行宮弁兵半月錢糧○丙戌

上謁

昭西陵

孝陵

孝東陵

景陵

裕陵

定陵○丁亥

清明節

上謁

定陵行數士禮率王以下文武大臣詣

隆恩殿行大饗禮禮成詣明樓前行辭謁禮○臨奠端慧皇太

子園寢

上奉

慈安端裕康慶皇太后

慈禧端佑康頤皇太后回鑾○己丑左宗棠奏正月初六七兩日劉錦棠進規

大通查看一路堡寨林立若節節攻取必滯戎機而懸軍深入又恐後路多梗乃畱六營擇要駐紮一面整隊速進初八日

撫回治復與馬福壽由通城馳至稟知城關同眾約二千餘惟叛奔馬壽之黨千長馬長忠韓喜文王成宗爲軍師袁滿拉等及其死黨仍誓死抗拒餘皆畏懼兵威並無固志劉錦棠飭遊擊董福祥雷守向陽堡親率各營縛馬壽以行甫抵城邊踞城之賊礮石紛下劉錦棠揮軍環攻令治復與馬福壽繞城而呼獻城迎降者免死擒賊者重賞忽見回眾數百開西門奔出羅拜馬前劉錦棠整隊入城逆賊噉眾下城巷戰各營乘勢蹂躪而上正克縣城劉錦棠下令撫諭降眾飭令導引官軍覓擒賊目當獲二百餘名斬之分飭各營分屯城關查點城內漢民據供向有三千餘人逆奔馬壽自小峽敗歸戕其丁壯見僅留老弱婦女六百餘口號哭之聲慘不忍聞劉錦棠遂提馬壽縶於市漢民爭摘其心肺啖之立盡並擒其死黨馬長忠等一百八十餘名駢戮之河東西及近城莊堡各頭目踵營納款均請盡繳馬械捆獻匪黨求免進剿西甯道郭襄之委雷陝補用知縣黃仁治署大通縣案初十日至城劉錦棠飭辦善後遷城關回民於河東西另招城西莊通布馬厥利順張家寺各漢堡難民實之路旁回堡亦量與難民更易十一日降回紛至大通營及永安一帶回目望風款附該處城已在二百里外矣十四五六等日各莊捆獻匪黨一百五六十名悉斬以徇人心大定十九日劉錦棠率隊仍旋西甯陝回在西甯者丁壯老弱婦女統計尙二萬有奇崔偉馬得彥畢大才等傾心向化劉錦棠挑其精壯立爲精善馬隊向陽堡之役助勦尤力惟白彥虎一起狡黠異常聞大通越事自知罪孽重大慮不爲官軍所容雖亦僞詞乞撫而責其呈繳馬械則遷延支展觀望不前崔偉等陰告劉錦棠豫爲之備劉錦棠時在大通飭撫回治復與率隊駐水峽一帶扼之十四五等日兩戰皆捷十六日深追遇伏所部亡失甚多治復與被賊生擒不屈死之白彥虎旋率眷屬黨與約二千餘潰出由永南山草灘一帶狂竄劉錦棠以方遷徙陝回各巨股老少不遑追截各陝回均俯伏哀鳴聽候安插當分爲三起約有二萬人派隊押赴平涼秦安清水等縣擇地安插臣據報卽分撥營縣妥爲照料一如化平廳故事並給新撫民每戶示諭一紙刊發良民門牌俾其遵守惟羸弱因踣行走遲滯見已分起押解給以行糧並發車馱載其婦稚輜重以遣其行西甯境內自此無客同羸難之患此遷徙西甯客回另籌安插之實在情形也臣維西甯地方遭回逆蹂躪久已名存實亡據土民云不覩天日者四十三年矣劉錦棠解西甯圍後痛勦大通悍賊一面收撫使輸誠者懷德挾詐者畏威俾糜爛至極不可收拾之區倏臻底定惟白彥虎乘隙狂竄偵知經過鐵賣溝等處冒雪奔馳途中凍僵者不少臣宗棠前檄降補參將楊世俊率所部馬步各隊及甘涼甯各軍准備截擊見據稟報已各有擒斬尙未收隊容緩陳明以清眉目而各軍探稟所報賊數多寡不同或者該逆途中多所迫脅未可知也其禹得彥崔偉畢大才等由西甯順伯平番過省點驗行走安靜當經遴員護解平涼清水秦安

化平各廳縣安善安插屬各屬善後事宜亦分飭斟酌安辦冀一勞永逸步後患而竟前功又奏馬本源兄弟竄踞巴燕
或格城自知罪在不赦意圖負隅聞劉錦棠逼勒大通復糾股竄紫巴城冀襲後路宗棠先檄飭提督劉明燈總兵敖天
印扼屯險隘該逆懼不敢前而陳提沈玉遂已率河州各軍於正月二十六日抵大河家偵知該逆眷屬均在戎城因商派
提督張仲春陳廣發總兵楊芳桂戴定邦率五品花翎馬占鼐及馬仲友馬良義等分起寅夜疾趨查大河家赴戎之路一
由循化一由米拉三溝兩路稍平而較遠乃議取道番地翻山直擣戎城攻其不備連日大雪迷漫各軍衝寒度險二十九
日抵端莊距巴城二十里回目馬永福等率眾迎降詢知馬桂源兄弟帶其死黨數百騎甫赴札巴正圖挈眷他竄陳提等
立飭馬占鼐率馬如蛟馬德等急進沈玉遂等督輕騎繼之馳至戎城叛逆業經西竄餘黨正絡繹奔赴官軍急分隊入城
一面跟追十餘里及賊後隊賊返旗抗拒官軍奮威衝殺斃悍賊七八十名截獲逆眷六口及其姻黨十餘名二月初一日
劉明燈敖天印率所部由米拉溝來會分駐城關實所獲馬本源馬桂源妻子於獄時大雪不止知該逆未遠遠馳也劉明
燈沈玉遂飭弁帶同勇楊生魁周世祥蔣來成馬仲魁馬永昌馬伏清等深入賊中諭以脅從罔治之意同眾爭繳馬械乞
撫叛逆馬桂源兄弟見人心已離惶懼益甚陰遣死黨求救於軍功馬占鼐馬占鼐飭其盡繳馬械初四日齊赴城外東山
乞撫一面稟知沈玉遂沈玉遂密派馬步隊環伏東山要隘比該逆至遂俯首就縛陳提赴巴燕廳先提其死黨馬五麻海
乙什馬肖箇麻箇子等三十餘犯斬之下馬桂源馬本源馬楨源於獄連日按拏餘匪並勒限外五工撒拉各頭目悉繳馬
械並撥各營扼要駐紮擬俟辦理循化一律就緒乃可班師先派兩營將馬桂源兄弟眷口押解赴省訊辦維巴燕戎回
番雜處山谷幽險與循化廳緊接叛逆馬桂源等本循化回族其由西甯遁入巴燕戎也蓋圖廣行勾結爲西竄之謀幸陳
提籌策精密沈玉遂及各營將士勦力同心其始不露聲色以緩其謀其繼解散黨與以孤其勢遂令狡猾兇豎自入網羅
不致重煩兵力又河湟表裏互爲聲應荒服闕絕用兵至難就河湟而言非先定河州剿撫兼施湟中亦難措手此次收復
巴燕戎廳員弁男丁均平定河州著續之人應請彙入一案保獎以昭激勵上諭軍機大臣等大通縣城爲逆蜀所踞堡
寨林立劉錦棠訪知其中死黨無多餘皆畏懼兵威因勢利導遂克縣城並將叛弁馬壽等擒斬辦理甚合機宜即著左宗
棠等飭令劉錦棠將善後事宜妥爲籌辦以期一勞永逸白彥虎乘隙狂竄左宗棠等當飭在事各軍認真追捕務獲毋令
日久稽誅此次出力文武員弁著准彙入前次各保案奏請獎勵另摺奏攻克巴燕戎城情形已降旨將出力人員照所請
獎賜矣將此由六百里各諭令知之○左宗棠奏金順一軍於十二月二十八日進紮城外北巖頭二十九日提督徐占彪

見金軍揚旗出隊慮其初到未諳地勢賊情派隊馳赴北河灘爲其策應賊先由北稍門出馬步二三千兵入軍隔河相持見金軍至遽擁來撲徐占彪嚴陣以待賊不敢近惟以槍礮轟擊良久賊稍懈徐占彪飭提督陳春萬總徐資祖福遊擊徐先春鈔其左總兵朱賢聲李洪超陳登雲鈔其右賊分兩路抵敵正酣戰間徐占彪率隊直擣中堅則退則適副將桂錫楨參將武朝聘從後截之追殺至北門而還計斃悍賊七八十名正月初二日所派往之提督陶生林金慶元總兵戴宏勝等馬步五營抵肅初四日賊與金軍接戰徐軍率隊援之賊退入城徐占彪連日於城西北添築六壘扼賊出入要路初八日黎明北稍門出步賊二三千馬賊五六百騎撲官軍新築各壘徐占彪以此路爲賊所必爭飛飭各營三路並進各壘亦開壁出擊斃賊甚多賊退踞城根抵拒並多匿溝中遮蔽槍礮見官軍愈奮愈緊初更後溝內匿賊潛遁入城官軍追殺至北稍門收隊初九日東稍門出馬賊四五百騎北稍門出步賊千餘仍撲新築各壘徐占彪率各營分路擊之賊尚未退忽南稍門出步賊七八百衝至官軍濠邊徐占彪飛調陶生林總兵齊懷松參將方友升等縱橫擊之兩路賊均敗入城計共斃賊百餘名訊據賊供初八日之戰高臺老二偽元帥戈什頭目王連萬長千長頭目十餘名均被陣斬初十日賊八九百復出北稍門甫列東湖灘卽經官軍擊敗退匿廢堡徐占彪飭開後膛開花礮擊斃甚多初十日夜三更後探報新到關外援賊四千餘帶叉子槍多桿並運糧駝千餘隻由北稍門偷入徐占彪飛調武朝聘方友升等馳往堵剿正值該逆絡繹入城之際官軍鼓銳截殺陣斬數十名生擒十八名奪獲駝二百餘隻訊據擒賊供稱馬四上年派口外阿渾李得隆赴紅廟子求援此賊援賊係紅廟子逆首安鄉約後隊阿渾裸萬材帶來徐占彪以前在城西北添築之壘距北稍門之路尙遠且營數過單十三日察看北門河灘忽見馬四於單家屯莊就廢堡連夜築成大方堡一座牆垣堅厚濠溝二道外加木城二道徐占彪以此堡不破則北稍門之圍猶有罅漏因於是夜派金慶元戴宏勝等環賊堡偏築四壘十四日黎明北稍門出馬步賊三四千分爲兩股一伏近堡廢牆內一撲戴宏勝營壘徐占彪親率遊擊鄭光平及陳春萬宋賢聲等迎頭猛擊令陶生林桂錫楨秦玉盛參將馮桂增等分左右後三路鈔之金軍派隊會剿戴宏勝亦乘勢出戰將兩股賊圍困一處斃賊無算賊敗退城下徐占彪以槍礮轟擊忽礮聲不震正詫異間瞥見賊婦女二人倒豎陣前似以妖術壓勝者徐占彪連放二十餘礮轟塌堡垣大餘堡賊竄出二三百被官軍圍殺逃脫無幾餘賊仍踞堡死守城上槍礮雨集官軍攻至黃昏收隊徐占彪知堡賊必已膽落是夜潛派各營環伏堡外隨令施放開花後膛大礮聞堡內人聲鼎沸知斃賊已多俄而堡內竄出賊二三百匿堡後濠溝被伏堡後官軍截殺擒斬百餘名徐占彪乘勝衝殺入堡堡內殘賊鮮得脫者天初明城中鳴鐘發

鼓北稍門出馬步賊六七百與敗殘餘賊合股循壕而來適遇伏堡西官軍突起截之伏堡右官軍亦躍出來攻其追殺堡後竄賊之官軍亦從中路橫衝賊隊斃賊多名賊大潰城中鐘鼓愈急徐占彪知賊必出大股拚命鏖戰飛調各軍分五路部署甫定北稍門果出馬步賊數千圖奪附城新堡並分股撲堡外官軍城上槍礮助之徐占彪令對賊麇聚之處連開大礮又向城頭轟擊賊紛紛倒撲時陶生林桂錫楨等分東西馳至徐占彪率隊從中路衝殺金慶元等由東湖灘橫截而出金軍馬步亦至賊應接不暇秦玉盛等又由北稍門截賊歸路賊殊死戰官軍四面盪決殲賊甚多二十一日賊復由北稍門出馬步二千餘循北河灘疾趨直撲戴宏勝營壘徐占彪飛飭各營張兩翼擊之親自率隊衝鋒而前至地勢平坦處賊忽走匿廢堡廢牆內徐占彪以前途無險可憑察看賊情有異勒兵勿進潛派各營於東南一帶分起設伏少頃東稍門忽出馬步賊二千餘衝撲藍明泰等營壘頃刻間逼近長壕各伏兵覘賊已深入一齊突出金軍亦派隊會擊賊敗退回城北稍門匪賊亦退是夜三更徐占彪令出賊不意襲攻禮拜寺每營挑壯士數十令方友升馬隊亦改步隊與黃祖福等伏寺之北陳春萬等伏寺之南徐占彪率隊伏寺之西其東面距城僅百步五更後調後膛開花礮對寺轟放子落開花寺賊惶遽急起出寺拚鬪東北兩面伏兵齊起賊不知所措躍入城壕竄匿寺內餘賊欲逃無路天將明金軍馬步亦至徐占彪於寺西架立雲梯督隊直上又飭壯士趨寺東附城一面斬關搶入寺內立克禮拜寺寺中賊無漏網者派幫統提督黃虎臣以副營三哨駐之黃昏時賊復自北稍門出死黨千餘循城壕而來多攜門板敗車城上又緹下皮襖數十束似爲深夜奪寺計徐占彪精選壯士百名令各持攔牌以避城上槍子當先衝擊賊將門板敗車堆燒寺外牆門官軍分兩路鈔截一面將火撲滅副營亦由寺內殺出斃賊百餘餘賊敗回維肅州城西禮拜寺同民稱係伊先輩祖塋初入中國時死者即多藏魄於此故敬護甚至附城之新堡與肅城相爲犄角至是均爲官軍攻破賊膽益寒長圍益密奉旨覽奏均悉仍著督飭徐占彪等實力進攻迅圖克復陣亡參將張集昌等均著交部從優議卹○庚寅 上奉 慈安端裕康慶皇太后 慈禧端佑康頤皇太后還宮○甲午諭內閣鮑源深奏藩司應遵旨赴京陛見並呈請開缺回籍補制一摺山西布政使李慶翱前在蒲州府任內丁憂因防務緊要未能回籍自應准其補制李慶翱著賞假百日回籍補行穿孝毋庸開缺候假滿後即行來京陛見○命五城奏賑展期兩月○丙申諭軍機大臣等金順奏會攻肅州獲勝請飭張曜前赴甘涼隴山西撥解軍餉成祿奏車馬短缺未能拔隊出關各摺片金順抵肅州後會同徐占彪攻剿獲勝賊勢已蹙著左宗棠責成徐占彪乘此機會認真攻剿以期早竟全功金順仍據遵前旨起期出關接統成祿所部能否酌留隊伍會攻肅城著該前將軍妥籌布置務臻周密